

**1085.**

1481 Oktober 28

***Der Rat schlichtet einen Streit zwischen den Böttchermeistern und -gesellen.***

*fol. 207r* Vormerckt, das uff sonntag Simonis et Jude anno etc. LXXXprimo durch den rath der irthumb unnd zweetracht, so zcwuschen den pöttichern den meistern und den gesellen desselbigen hantwergs gewest ist,<sup>a)</sup> in den sachen Paul Kūnen, auch einen potticher, belangende mechtiglichen und endtlichen geschiden ist mit beider pardt willen und wissen. Also das sie von beiden teilen, die meister und gesellen gute frunde sein sollen und ein pardt das andere eren und fördern noch yrem vormogen, den selbigen Paul Kūne vor gut uff yrem hantwerg, halden sollen mit zcu schigkunge der gesellen und ander furderunge des hantwergs, auch alle gesellen in unser gnedigen herrn furstenthumb und landen nicht anders denne vor gut halden und kein arges uff dem hantwerg nochsagen. Das denne die meister und gesellen vor einem rathe zcu halden gewilliget haben darumbe er den gesellen zcu gedechnis mit vorwilligunge und beteidung des rates eine tonne bier geschanckt hat.

*a) folgt durchgestrichen mechtiglich*